

Il pled rumantsch 2014

Tschertgà vegn il pli bel u il pli creativ u il pli surpudent pled

■ (rtr) **Ensemen cun il public tschertga RTR Radiotelevisiun Svizra Rumantscha ils 11 da december 2014 il pled rumantsch da l'onn 2014. Il «raffader» ha fatg l'onn passà la cursa, «arsuc» è stà il pled 2012 ed avant han las Rumantschas ed ils Rumantschs votà per il pled «tgutglar».** Gudagnar po mo in pled – far la cursa pon quest onn dentant anc auters plets e quai sco part da text en in rap rumantsch. Per quai procuran *Gino Clavuot* alias «Snook» e ses collega da band *Cla Riet Rauch*. La damaun vegnan els cun in «beat» en il studio dal Radio Rumantsch. Lur sfida: tscherner da tut las propostas dal public 12 plets e far cun quels fin mezdi in rap rumantsch.

Suentermezdi tscherna la giuria da tut ils plets che vos avais annunzià enfin ils 11 da december a las 12:00 «Il pled rumantsch 2014». Tgenin che quai vegn ad esser tradescha Gino Clavuot sez en il Telesguard. El perpetnisescha il pled da

l'onn live en in vers da rap. Gudagnar po dentant er il public.

Era quest onn po quella u quel ch'ha inoltrà il pled dal 2014 far la schelta tranter in abunament da La Quotidiana, la concessiun da radio e televisiun per in onn ubain in bon per cudeschs offri da la Lia Rumantscha.

Propostas pon vegnir inoltradas enfin ils 11 da december 2014 cun il formular sin la pagina d'internet www.rtr.ch, per telefon sin 081 255 79 00, via mail rtrpled14@rtr.ch, sin la pagina www.facebook.com/rtr.ch u via Twitter cun inditgar #rtrpled14 ubain per posta a «Pled rumantsch 2014»; c/o Radiotelevisiun Svizra Rumantscha; Via da Masans 2; 7002 Cuir

**Program dal «Di dal pled rumantsch»:
Radio Rumantsch: gievgia, ils 11-12-2014
da las 06.00–12.30
Telesguard: gievgia, ils 11-12-2014
a las 17:40 sin SRF1
Online: www.rtr.ch**